



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa 11 Dezembru 2023

JSMP kontinua fasilita treinamentu kona-ba tráfico umanu ba liña frente sira iha fronteira Mota Masin

Iha 21 no 22 Novembru 2023, JSMP fasilita treinamentu ho matéria tráfico umanu, prevensaun no responde ba kazu tráfico umanu no Violénsia Bazeia ba Jéneru (VBJ) ba pesoál sira hamutuk ema na'in 21 hosi instituisaun sira liña frente mak hanesan Imigrasaun na'in 2, Unidade Patrollamentu Fronteira (UPF) na'in 1, Kuarentina na'in 2, Alfândega na'in 2, Postu Saúde Salele, Uma Mahon Salele na'in 2 no mobilizador sira suku nian na'in 11. Treinamentu ne'e hala'o iha Postu Imigrasaun Salele, Mota Masin, Suai- Kobalima.

Treinamentu ida ne'e nu'udar parte ida hosi programa tinan rua (2) ho título "Prevensaun no Resposta ba Tráfico Umanu ho Baze iha Komuidade, Responsivu ba Jéneru no Sentradu ba Sobrevivente (2023-2024)" ne'ebé finansia hosi Governu Timor-Leste liuhosi Ministériu Interiór no implementa hosi UN Women Timor-Leste ne'ebé parseria ho JSMP. Ba treinamentu dahaat nian ne'e, JSMP halo ona treinamentu ba membru komuidade no membru instituisaun relevante sira iha área fronteira hamutuk ema na'in atus ida resin ona.

"Treinamentu ida ne'e nu'udar treinamentu kontinuasaun hosi treinamentu sira anteriór sira ho objetivu atu hasa'e koñesimentu liña frente no mobilizadór sira nian kona-ba igualdade jéneru no violénsia bazeia ba jéneru no oinsa atu identifika kazu tráfico umanu, nune'e bele halo prevensaun no ajuda lezadu/a sira bainhira iha kazu tráfico umanu", dehan Sra. Ana Paula Marçal, Diretora Ezekutiva JSMP

Iha abertura treinamentu ne'e, Sr. Jose Moniz nu'udar staff senior ba advokasia introdús serbisu JSMP nian no objetivu hosi treinamentu ne'e. Iha nia intervensaun, hato'o agradesimentu wa'in ba xefe Imigrasaun, xefe Kuarentina, Alfândega no Komandante UPF ne'ebé bele serbisu hamutuk hodi fornese fatin no facilidade ba JSMP, nune'e bele realiza treinamentu ne'e. Jose Moniz husu mós ba partisipante sira atu fó atensaun no ativu iha diskusaun, nune'e bele aprende buat ruma no iha koñesimentu hodi identifika krime tráfico umanu no bele halo prevensaun no apoia no refere vítima sira.

Iha sesaun apresentasaun ne'e, partisipante sira antuziasmu hodi rona matéria sira no ativu inklui hato'o sira nia preokupasaun sira relasiona ho fahe serbisu entre feen ho la'en iha uma laran, apresentasaun denúnsia ba krime públiku, protesau ba testemuña no oinsa prova krime violasaun seksuál. Entretantu, iha sesaun matéria tráfico umanu, partisipante sira husu kona-ba labarik sira ne'ebé halo esmola iha fatin-fatin tama kategoria nu'udar tráfico umanu ka lae, lori ema hakat fonteira mak konsidera hanesan tráfico umanu ka iha rai laran de'it mós bele konsidera ona hanesan tráfico umanu. Pergunta seluk, ema sira ne'ebé fasilita ema seluk ba rai liur

ho intensaun atu explora maibé la konsege lori sai tanba autoridade deskobre tiha antes, ne'e konsidera hanesan tráfiku umanu ka lae.

Iha sesaun matéria, médiku responsável iha pontu entrada Salele konsidera treinamentu ida ne'e hanesan buat foun ida ba nia, tanba ne'e nia hakarak atu aprende no apar matéria sira iha treinamentu. Nia haktuir katak durante treinamentu, matéria ne'ebé nia aprende liu kona-ba tráfiku umanu, saida mak tráfiku umanu, elementu sira hosi tráfiku umanu ne'ebé tenke priense bainhira hahalok ida konsidera tráfiku umanu. Elementu importante tolu ne'e mak hanesan asaun, meu sira no objetivu.

Nia konsidera treinamentu ne'e hasa'e sira nia koñesimentu no ida ne'e hanesan lisaun ida ne'ebé bele aumenta sira nia kapasidade iha área médiku nian, liuliu atu bele halo identifikasaun ba sinál sira hosi krime tráfiku umanu.

Nia parte mós sei kontinua fahe informasaun importante ne'e ba nia maluk médiku sira seluk ne'ebé la hetan oportunidade hodi partisipa iha formasaun ne'e atu sira mós bele iha koñesimentu kona-ba tráfiku umanu no bainhira identifika sinál ruma katak 'ema" ruma sai vítima ka deskonfia prátika tráfiku umanu, nia iha koñesimentu atu bele relata ba iha instituisaun relevante sira hanesan polísia, Ministériu Públiku ka rede referál sira atu fó assisténsia.

Atu hetan informasaun liután favór kontaktu
Sra. Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl>